

Morning Dogri (NSD) National News Bulletin 21-06-2024

आकाशवाणी

- दुनिया भरै च अज्ज 10मां अंतर्राष्ट्रीय योग दिवस मनाया जा'रदा ऐ। प्रधानमंत्री नरेन्द्र मोदी होरें ऐकती श्रीनगर च आयोजित योग दिवस कार्यक्रम च शामिल होइयै मुख्यै दे योग समारोहें दी अगुवाई कीती।
- प्रधानमंत्री नरेन्द्र मोदी होरें कल 15 सौ करोड़ रपे दी लागत दिएं 84 परियोजनाएं च किश दा नीह पत्थर ते किश दा उदघाटन कीता। उनें लोकसभा चुनावं च बधी-चढ़ियै हिस्सा लैने पर जम्मू कश्मीर दे लोकें गी ममारकबाद दित्ती ते आखेआ जे तौले गै इत्थें विधानसभा दे चुनावं करोआइयै जम्मू कश्मीर गी परतियै राज्य दा दर्जा दित्ता जाग।
- बंगलादेश दी प्रधानमंत्री शेख हसीना भारत दे दऊं दिनें दे दौरे पर अज्ज नमीं दिल्ली पुज्जा करदियां न।
- सीबीआई नै 2024 यूजीसी नैट दे मतेयानें च कथित गड़बड़िं दी शकैतें दे चलदे इक मामला दर्ज कीता ऐ।
- सरकार कोयले दिएं खाने दी निलामी दा 10मां गेड़ अज्ज शुरू करा'रदी ऐ।
- मर्दे दे टी-20 क्रिकेट विश्व कप दे इक सुपर-8 मकाबले च कल भारत नै अफगानिस्तान गी 47 रंजें कन्नै हराई दित्ता।

<><><><><><>

Yoga Diwas

मुख्यै दे बक्ख-बक्ख हिस्सें दे इलावा दुनिया भरै च अज्ज 10मां अंतर्राष्ट्रीय योग दिवस मनाया जा'रदा ऐ जेहदे तैहत बडले सवेला थमां गै लोकें इस मौके लोआए गेदे योग शिविरें च हिस्सा लैना शुरू करी दित्ते दा हा। केई थाहरें योग दिवस दे मौके पर कार्यक्रम बडलै 5 बजे गै शुरू होई गेदे हे जिसलै जे केई थाहरें अजें एह विशेष योग शिविर चलै करदे न।

प्रधानमंत्री नरेन्द्र मोदी होर हर ब'रे इस मौके पर मुख्खै दे कुसै इक हिस्से च लगने आले समारोह च शामिल होइयै इनें आयोजनें च राष्ट्र दी अगुवाई करदे न ते ऐकती ओह श्रीनगर च आयोजित कार्यक्रम च शामिल होए न। दरअसल अज्जै दा एह कार्यक्रम श्रीनगर दे शेर-ए-कश्मीर अंतर्राष्ट्रीय कन्वेंशन सेंटर दे पिछले बेहड़े च बडलै साढ़े 6 बजे शुरू होना हा पर उत्थें अज्ज बडलै थमां गै तेज बरखा लग्गी दी ऐ जिस कारण इसी खुल्ले च करोआने दे बजाए कनवेंशन सेंटर दे हाल च आयोजित कीता गोआ। उआं अज्ज 7 जहार लोकें दा इस आयोजन च प्रधानमंत्री हुंदे कन्नै योग करने दा कार्यक्रम हा। इस मौके प्रधानमंत्री होरें आखेआ जे योग दी यात्रा उपरोतली जारी ऐ ते दुनिया च दिनो दिन योगाभ्यास करने आलें दी गिनतरी बधदी जा करदी ऐ। उनें आखेआ जे योग शडी इक सिखलाई जां पढ़ाई नेई, अपने आपै च विज्ञान ऐ। अज्ज सूचना संसाधने दा हाड़ जन आई गेदा ऐ जेहदे चलदे कुसै इक विषय पर ध्यान केन्द्रित करना मता कठन होआ'रदा ऐ ते एहदे हल्ल बी योग च ऐ। उनें आखेआ जे दुनिया दे बड्डे बड्डे नेता जिसलै उंदे कन्नै गल्ल करदे न तां योग बारे जरूर चर्चा होंदी ऐ। साऊदी अरब नै इसी अपने शिक्षा बवस्था च शामिल करी लैते दा ऐ जिसलै जे जर्मनी च डेढ़ करोड़ लोकें योगाभ्यास करना शुरू करी दित्ते दा ऐ। भारत दे ऋषिकेश, काशी कोला लेइयै केरल तोड़ी योग-टूरिज्म गी लेइयै लोकें च उत्साह दिक्खने गी लब्भा'रदा ऐ। भारत च केई योग सेंटर खोले गेदे न जित्थें माहिरें आस्सेआ लोकें गी सिखलाई दित्ती जा'रदी ऐ। उनें आखेआ जे योग राएं नोजवानें गी कम्म रोजगार दे बी मते मौके थोआ करदे न। 10 ब'रें पैहले 2014 च संयुक्त राष्ट्र नै 21 जून गी अंतर्राष्ट्रीय योग दिवस घोषत कीता हा। एहदे शा पैहले प्रधानमंत्री होरें श्रीनगर च तकरीबन 2 जहार नोजवानें गी नियुक्ति पत्र बंडे हे ते 15 सौ करोड़ रपे दी कीमत आले 84 बड्डे विकास परियोजनाएं दा नीह पत्थर रखेआ हा। श्रीनगर च जनसभा गी संबोधत करदे होई प्रधानमंत्री होरें भरोसा दोआया जे जम्मू कश्मीर गी परतियै राज्य दा दर्जा तौले गै दित्ता जाग। उनें एह बी आखेआ जे केन्द्र सरकार जम्मू कश्मीर च हाल च गै होए दे आतंकी हमलें दे साजशकर्ताएं खलाफ तौले गै बनकदा परता देग। एहदे अलावा प्रधानमंत्री होरें जम्मू कश्मीर दे लोकें गी लोकसभा चुनां च हिस्सा लैने लेई बधाई दित्ती ते तौले गै इत्थें विधानसभा चुनां करोआने बारे गलाया।

<><><><><><><>

Kovind Yoga

साबका राष्ट्रपति रामनाथ कोविंद होंरें बी अंतर्राष्ट्रीय योग दिवस दे मौके पर बधाई दिक्ती ऐ ते आखेआ जे योग कुसै धर्म जां समुदाय कन्नै नेई सगुआं पूरी दुनिया कन्नै जुड़े दा इक बचार ऐ। आकाशवाणी कन्नै गल्ल करदे होई आखेआ जे योग लोकें गी इक दुए कन्नै जोड़दा ऐ। उनें आखेआ जे योग बेहतरिन ते सेहतमंद जीवन जीने लेई मता जरूरी ऐ।



Gujrat Yoga

गुजरात च योग दिवस दे मौके पर इक खास कार्यक्रम नाडा बेट च लोआया जा'रदा ऐ जेहड़ा भारत पाकिस्तान सीमा दे कोलकाल बनासकंथा जिले च ऐ। इस कार्यक्रम च मुखमंत्री भूपेन्द्र पटेल बी हिस्सा लैंगन ते तकरीबन 10 ज्हार कोला बद्ध लोकें दा एहदे च शामिल होने दी मेद ऐ। तोआई केन्द्रीय गृह ते सहकारिता मंत्री अमित शाह अहमदाबाद च योग दिवस दे मौके पर कार्यक्रम च हिस्सा लैंगन। केन्द्रीय जल शक्ति मंत्री सी.आर.पटेल हुंदा सूरत च कार्यक्रम च हिस्सा लैने दा कार्यक्रम ऐ।



Bangladesh

बंगलादेश दियां प्रधानमंत्री शेख हसीना होर अज्ज दऊं दिनें दे दौरे पर भारत आवा'रदियां न। उंदे दौरे दरान प्रधानमंत्री नरेन्द्र मोदी हुंदे कन्नै दपक्खियां गल्लबात दे अलावा शेख हसीना हुंदा राष्ट्रपति द्रौपदी मुर्मू ते उपराष्ट्रपति जगदीप धनखड़ हुंदे कन्नै मलाटी करने दी बी कार्यक्रम ऐ। बंगलादेश दियां प्रधानमंत्री विदेश मंत्री डॉ. एस.जयशंकर हुंदे कन्नै बी मिलगंन। भारत च नमीं सरकार बनने परेंत एह पैहली विदेश यात्रा ऐ। जेहदे च बंगलादेश दियां प्रधानमंत्री शेख हसीना होर भारत आवा'रदियां न।



UGC-Net

सीबीआई नै यूजीसी-नैट जून 2024 आले मतेयान दे सरबंधै च इक मामला दर्ज कीता ऐ। एह मामला शिक्षा विभाग दे सचिव हुंदी तरफा हासल शकैत, कि यूजीसी-नैट दे मतेयान दी गरिमा कन्नै खिलवाड़ कीता गेआ ऐ, दी बिनाह पर बेपंछानू लोकें खलाफ दर्ज कीता गेआ ऐ। मामला अपराधिक साजश रचने ते धोखाधड़ी जनेए अपराधें दिएं धाराएं तैहत दर्ज कीता गेआ ऐ। यूजीसी-नैट दा मतेयान मुल्लख भरै च बनाए गेदे मतेयान केन्द्रें च इस म्हीने दी 18 तरीक गी लैता गेआ हा।



Coal Auction

केन्द्र सरकार अज्ज कारोबारी इस्तेमाल लेई कोयले दिएं ब्लाकें दी निलामी दे 10में राउंड दी शुरूआत करोग। इस राउंड च 60 ब्लाकें दी निलामी कीती जा'रदी ऐ। कोयले ते खाने सरबंधी मंत्री जी. किष्ण रेड्डी हैदराबाद च निलामी दी शुरूआत करगंन।



President Murmu

राश्ट्रपति द्रौपदी मुर्मू होरें लोकसभा अध्यक्ष दा चुनां होने तगर बीजेपी सांसद भर्तहरि महताब होरें गी अस्थाई अध्यक्ष नियुक्त कीता ऐ। 18मीं लोकसभा दा पैहला इजलास 24 जून कोला शुरू होआ'रदा ऐ। लोकसभा अध्यक्ष दा चुनां 26 जून गी करोआया जाग। राश्ट्रपति होर संसद दे दौनें सदनें दी सांझी बैठक गी संबोधत करगंन। राज्यसभा दा इजलास 27 जून गी शुरू होग। आरजी तौर परस्पीकर चुने जाने बारे जानकारी दिंदे होई संसदीय मामले दे मंत्री किरेंन रिजिजू होरें सोशल मीडिया पर जानकारी दित्ती जे राश्ट्रपति होरें किश होर सांसदें जिंदे च सुरेश कोडी-कुन्निल, थलिवकोताए राजूथेवर बालू, राधामोहन सिंह, फग्गन सिंह कुलस्ते ते सुदीप बददोपध्याय शामिल न, होरें गी नमें स्पीकर दे चुनां तोड़ी मर्तहरि महताब होरें गी सैहयोग देने लेई आखेआ ऐ।



Babbar Khalsa

राश्ट्रीय जांच अर्जेसी एनआईए नै कल आतंकी संगठन बब्बर खालसा अंतराश्ट्रीय दे इक आतंकवादी लखबी सिंह संधु कन्नै जुड़े दे इक महत्वपूर्ण शक्स गी गिरफ्तार कीता ऐ। एनआईए नै आखेआ जे 10 संदिग्ध व्यक्तिएं दे घरे मकाने च जांच करने परैत जसप्रीत सिंह गी पंजाब दे फिरोजपुर जिले थमां गिरफ्तार कीता ऐ। जसप्रीत दे कब्जे थमां केई डिजीटल उपकरणों दे अलावा ऐतराजयोग सामग्री बरामद होई ऐ, जेहड़ा जसप्रीत गी विदेशी आतंकवादी लखबीर सिंह संधु दा सैहयोगी होने बारे दस्सदी ऐ।



Film Festival

मुंबई च आयोजित 18मां अंतराश्ट्रीय फिल्म महोत्सव अज्ज थमां समाप्त होई जाग। 7 दिन चलने आले इस कार्यक्रम दी शुरुआत इस म्हीने दी 15 तरीक गी भारतीय “Billy & Molly an Otter Love Story कन्नै होई ही, जेहृदा निर्देशन चार्ली हमील्टन जेम्स होरें कीता हा।



Cricket

मर्दे दे टी-20 क्रिकेट विश्व कप च भारत नै जंदी रातीं अफगानिस्तान गी 49 रंजें कन्नै हराई दित्ता। एह मैच बारबडोस केनजिंग्टन ओवल च खेड्डेआ गेआ। सुपर-8 स्टेज दी पैहले मैच व भारतीय टीम नै पैहले बल्लेबाजी करदे होई तैह 20एं ओवरें च 8 विकटें दे नुक्सान पर 181 रंज बनाए। सूर्यकुमार यादव नै 28 गेंदें च 53 रंज बनाए ते हार्दिक पांडेया नै 24 गेंदें च 34 रंज बनाए। एहदे परते च अफगानिस्तान तैह 20एं ओवरें च शड़े 134 रंज गै बनाई सकी। जसप्रीत बुमराह ते अर्शदीप सिंह नै 3-3 विकटां हासल कीतियां ते सूर्यकुमार यादव गी प्लेयर ऑफ द मैच घोषत कीता गेआ। सुपर-8 दे गेड़ च अज्ज थमां सेंट लूसिया च इंग्लैंड दा मकाबला दक्खन अफ्रीका कन्नै होग।

